



KERATAN AKHBAR DAN MEDIA ONLINE UNTUK MAKLUMAN :

**Y.B. MENTERI
Y.B. TIMBALAN MENTERI
Y.BHG. KSU
Y.BHG. TKSU (PDN)
Y.BHG. TKSU (PUP)
SETIAUSAHA AKHBAR**

15 MEI 2021 (SABTU)



KERATAN AKHBAR DAN MEDIA ONLINE (KPDNHEP)

15 MEI 2021 (SABTU)



Kaut untung guna jenama orang lain

KPDNHEP tangkap 63 orang, rampas barang tiruan RM51 juta sejak 2019

Oleh MUHAMMAD AFHAM RAMLI

KUALA LUMPUR

Sanggup memanipulasi hak cipta orang lain semata-mata mahu kaut untung berlipat kali ganda.

Itu taktik penjenayah cetak rompak barang tiruan yang sering dibongkar Kementerian Perdagangan Dalam Negeri dan Hal Ehwal Pengguna (KPDNHEP).

Namun, tindakan segelintir peniaga dengan modus operandi berbeza sedikit pun tidak mematahkan semangat pihak berkuasa untuk terus berusaha melindungi hak cipta daripada disalah guna.

Menjelaskan lebih lanjut, Pengarah Penguat Kuasa KPDNHEP, Azman Adam berkata, berdasarkan statistik seluruh negara membabitkan kes barang tiruan, sejak tahun 2019 hingga Mac tahun ini, pihaknya mere-

kodkan 63 tangkapan di bawah Ops Jeriji dengan 1,735 kes dan rampasan keseluruhan berjumlah RM51.3 juta.

Menurutnya, mengikut pecahan seramai 27 orang ditangkap membabitkan 663 kes dengan nilai rampasan mencecah RM18.1 juta pada tahun 2019.

"Pada tahun 2020, jumlah tangkapan meningkat kepada 34 orang melibatkan 1,015 kes dan rampasan berjumlah RM32.8 juta.

"Schingga Mac tahun ini pula, dua suspek berjaya ditahan hasil 57 kes yang diterima membabitkan rampasan bernilai RM393,773," katanya kepada *Sinar Harian* baru-baru ini.

Azman berkata, statistik itu menunjukkan ketegasan kerajaan dalam membanteras barangan tiruan di pasaran hasil kerjasama wakil pemilik cap dagangan.

Beliau berkata, modus operandi sesuatu penjualan dan pengedaran barang tiruan boleh dikatakan berbeza mengikut jenis barangan.

"Sebagai contoh, bagi pembuatan arak tiruan, modus operandi yang digunakan adalah dengan mengitar semula botol arak yang asli, kemudian diisi semula dengan arak murah atau campuran alkohol yang tidak diketahui kandungannya.

"Selepas itu, arak tersebut diedar ke

pusat hiburan dan kedai runcit dengan menggunakan label dan penutup tiruan.

"Begitu juga dengan dakwat pencetak komputer tiruan.

"Bekas dakwat asli dikitar semula kemudian diisi dengan dakwat yang berkualiti rendah sebelum diedar ke pasaran menggunakan kotak asli yang turut dikitar semula," terang beliau.

Ujar Azman, bagi barang tiruan berupa pakaian, kasut dan beg, boleh dikatakan majoriti barangan tersebut diimport dari luar negara.

Ini kerana kos pembuatannya dipercayai jauh lebih murah di sana berbanding di Malaysia.

"Bagaimanapun, terdapat juga kes di mana pembuatan pakaian menggunakan jenama tiruan yang dihasilkan di Malaysia.

"Ini susulan pembongkaran menerusi operasi pada 29 Mac 2021 di ibu negara melibatkan sitaan 121 acuan yang digunakan bagi mencetak jenama popular pada pakaian yang disita.

"Kes tersebut melibatkan rampasan, sebanyak 4,630 helai pakaian selain peralatan yang digunakan untuk mencetak," ujarnya.

Katanya lagi, KPDNHEP percaya barang tiruan tersebut dipasarkan kepada pengguna menerusi penjualan di premis-premis terbuka mahupun secara dalam talian.



Media sosial jadi platform lariskan barang tiruan

MENURUT Azman Adam, perubahan dan perkembangan teknologi turut menyumbang kepada pengedaran barang tiruan di Malaysia lebih-lebih lagi peniaga terbabit turut terkesan dengan Perintah Kawalan Pergerakan (PKP).

"PKP memberi alternatif kepada peniaga untuk menjual barangan secara dalam talian seperti makanan, pakaian, barangan keperluan harian dan lain-lain. Ini termasuklah menjual barang tiruan oleh peniaga yang tidak bertanggungjawab."

"Terdapat juga penjual kecil-kecilan yang menggunakan internet sebagai medium penjualan dan pengedaran."

"Penjualan barang tiruan secara dalam talian merupakan cabaran kepada KPDNHEP serta agensi penguatkuasaan lain," katanya.

Jelas Azman, helah yang melibatkan penjualan barang tiruan secara online adalah sedikit berbeza di mana terdapat juga penjual yang hanya bertindak sebagai ejen yang tidak menyimpan stok barangan tersebut.

Menurutnya, ejen ini hanya bertindak sebagai orang tengah dan akan membuat tempahan dari luar negara seterusnya barangan akan dihantar terus kepada

pengguna.

"Bagaimanapun, KPDNHEP telah menjalankan penguatkuasaan barang tiruan di medium online untuk memastikan aktiviti ini dibanteras sepenuhnya."

"KPDNHEP bekerjasama dengan agensi lain seperti Suruhanjaya Komunikasi dan Multimedia (SKMM) dan pemilik tapak pasar dalam talian seperti Lazada dan Shopee."

"Antara kaedah yang KPDNHEP gunakan adalah melaksanakan sekatan laman web atau pautan yang menjual barang tiruan."

"Kedua, melaksanakan penurunan (membuang) kandungan iklan atau penjualan barangan tiruan selain bekerjasama dengan wakil pemilik cap dagang dalam mengenal pasti pemilik akaun atau penjual dalam talian," katanya.

Tambah beliau, selain itu, KPDNHEP juga membuat sitaan selepas maklumat risikan diperolehi.

Dalam pada itu, pihaknya juga berdepan dengan cabaran seperti penjual yang menggunakan nama samaran serta telefon bimbit yang didaftarkan atas nama orang lain. Ada juga penjual yang menggunakan identiti berbeza selepas iklan asal diturunkan oleh pengendali laman dagangan

seperti Lazada dan Shopee.

"Namun, tindakan kita tetap tegas dalam usaha membanteras kegiatan yang menyakiti undang-undang."

"KPDNHEP juga sentiasa melakukan risikan untuk mengenal pasti sumber atau lokasi penjual dalam talian," katanya.

Ujarnya lagi, KPDNHEP juga telah mengenal pasti beberapa lokasi panas yang menjalankan aktiviti jualan barangan tiruan di seluruh negara.

"Lokasi tersebut sering menjadi tumpuan pelancong asing sebelum PKP dan boleh memberikan imej buruk kepada negara sebagai pusat penjualan barang tiruan."

"Pasukan kita sentiasa memantau lokasi terlibat dan dijadikan sebagai petunjuk prestasi utama (KPI) bagi memastikan penjualan barang tiruan tidak berleluasa di lokasi terabit."

"KPDNHEP telah menetapkan KPI bagi membanteras aktiviti penjualan dan pengedaran barang tiruan di bawah Ops Tiru," terang beliau.

Melalui KPI ini, KPDNHEP menetapkan premis-premis yang dikenal pasti untuk operasi pemantauan bagi memastikan pematuhan di seluruh negara terlaksana.



Anggota penguatkuasaan KPDNHEP menjalankan pemeriksaan ketika serbuan di sebuah premis.



Barangan tiruan (barang disita) KPDNHEP Wilayah Persekutuan dalam operasi baru-baru ini.

Salah satu premis yang menjual jenama tiruan di ibu negara dikenakan tindakan.

Kini warga asing jadi tauke

DEDAH Azman Adam, sebelum ini warga asing yang ditangkap merupakan pekerja yang diupah untuk menjual atau menjaga kedai barang tiruan.

Namun, terdapat warga asing sendiri yang mendalangi kegiatan membawa masuk barang tiruan berupa pakaian ke Malaysia.

"Kita tidak nafikan perkara itu. Kita pernah tahan dan rampasan barangan."

"Ada kes suspek warga asing disyaki menjadi dalang membawa masuk serta menjalankan percetakan pakaian menggunakan jenama tiruan," katanya.

Azman berkata, permintaan tinggi menjadi faktor penjualan barang cetak rompak dibuat secara besar-besaran.

Selain itu, kesedaran pengguna terhadap kepentingan menjaga hak harta intelek juga masih rendah.

"Pengguna kadangkala menyedari barang yang dibeli adalah bukan barang asli, tetapi disebabkan harga yang murah dan berjenama, barangan tersebut tetap menjadi pilihan," cerita beliau.

Tambah Azman, faktor barang tiruan tersebut boleh didapati secara dalaman talian juga menyebabkan kegiatan ini menjadi tidak terkawal.

Katanya, bukan sahaja kerana permintaan daripada pengguna, tetapi juga kemudahan teknologi secara tidak langsung memudahkan peniaga menjual barangan tersebut di pasaran.

Dalam pada itu menurut Azman, KPDNHEP tidak teragak-agak untuk melaporkan salah laku dan mengambil tindakan terhadap mana-mana pegawai

STATISTIK KES, RAMPASAN DAN TANGKAPAN SELURUH NEGARA

TAHUN	2019	2020	2021 (hingga Mac)
JUMLAH KES	663	1015	57
RAMPASAN (RM)	18.1 juta	32.8 juta	0.39
TANGKAPAN	27	34	2

dan anggota sekiranya terbukti melindungi kegiatan sedemikian.

"Mereka yang didapati bersubahat akan dikenakan tindakan keras. Ini amanah KPDNHEP. Kita tidak mahu pegawai kita terlibat dalam jenayah ini," katanya.

Azman menegaskan, mana-mana individu yang mempunyai maklumat mahupun bukti, boleh tampil menyerahkan maklumat kepada pihaknya.

Sekiranya ada dakwaan sedemikian, bukti-bukti yang berkaitan boleh dikemukakan untuk diambil tindakan.

"Kalau terdapat keterangan yang menyatakan ada anggota penguat kuasa melindungi kegiatan ini, mereka akan berdepan tindakan," katanya.

Tegas Azman, beliau sentiasa mengingatkan pegawai dan anggotanya agar tidak terlibat dalam salah laku berkaitan integriti khususnya.

Selain itu, beliau juga menafikan dakwaan terdapat tindakan yang dilakukan pihaknya bersifat dua darjat.

"Dalam statistik kes yang dicatatkan, operasi dijalankan tanpa mengira tempat mahupun siapa penjualnya, tidak kira bangsa," jelasnya.

Peniaga atau pelaku yang diambil tindakan dan sabit kesalahan boleh didenda tidak melebihi RM10,000 bagi

setiap barangan atau dipenjarakan tidak melebihi tiga tahun di bawah Akta Cap Dagangan 2019.

KPDNHEP boleh mengambil tindakan di bawah Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001.

"KPDNHEP mengingatkan mana-mana peniaga yang menjalankan urusan niaga barang tiruan dan cetak rompak agar menghentikan kegiatan itu.

"Orang awam yang menjumpai mana-mana premis yang menjual barangan tiruan dan cetak rompak di pasaran fizikal mahupun pasaran online pula diminta salurkan aduan kepada KPDNHEP di talian 1-800-886-800 atau WhatsApp ke 019-279 4317.

"Aduan juga boleh salurkan melalui portal aduan.kpdnhep.gov.my untuk diambil tindakan sewajarnya," kata Azman.

Tambahnya, KPDNHEP bertekad tidak mahu negara ini menjadi pusat penjualan barang tiruan secara berleluasa sekali gus menyebabkan pelabur yang ingin menjalankan perniagaan berasa tidak yakin sekali gus mengakibatkan kerugian kepada negara.



Sebuah stor simpanan barang tiruan di ibu negara yang dibongkar KPDNHEP dalam serbuan baru-baru ini.